



文選正文

山子點

十二

~ 16
2684
13



門へ 16
2684
卷 73

文選正文卷之十一

連珠類

演連珠五十首

陸機

臣聞日薄星廻穹天所以紀物山盈川冲后土所以播氣五行錯而致用四時違而成歲是以百官恪居以赴八音之離明君執契以要克諧之會

臣聞任重於力才盡則困用廣其器應博則凶是以物勝權而衡殆形過鏡則照窮故明主程才以效業貞臣底力而辭豐

臣聞髦俊之才世所希乏丘園之秀因時則揚是以大人基命不擢才於后土明主聿興不降佐於昊蒼

昭和九年
七月三日
印

臣聞世之所遺未爲非寶主之所珍不必適治是以俊乂之
藪希蒙翹車之招金碧之巖必辱鳳舉之使
臣聞祿放於寵非隆家之舉官私於親非興邦之選是以三
卿世及東國多衰弊之政五侯並軌西京有陵夷之運
臣聞靈輝朝覲稱物納照時風夕灑程形賦音是以至道之
行萬類取足於世大化既洽百姓無匱於心
臣聞頓網探淵不能招龍振網羅雲不必招鳳是以巢箕之
叟不盼丘園之幣洗渭之民不發傅巖之夢
臣聞鑒之積也無厚而照有重淵之深目之察也有畔而照
周天壤之際何則應事以精不以形造物以神不以器是以
萬邦凱樂非悅鐘鼓之娛天下歸仁非感玉帛之惠

臣聞積實雖微必動於物崇虛雖廣不能移心是以都人冶
容不悅西施之影乘馬班如不輟太山之陰
臣聞應物有方居難則易藏器在身所乏者時是以充堂之
芳非幽蘭所難繞梁之音實繁絃所思
臣聞智周通塞不爲時窮才經夷險不爲世屈是以陵騷之
羽不求及風曜夜之日不思倒日
臣聞忠臣率志不謀其報貞士發憤期在明賢是以柳莊黜
殞非食瓜衍之賞禽息碎首豈要先茅之田
臣聞利眼臨雲不能垂照朗璞蒙垢不能吐輝是以明哲之
君時有蔽壅之累俊乂之臣屢抱後時之悲
臣聞郁烈之芳出於委灰繁會之音生於絕絃是以貞女要

名於沒世。烈士赴節於當年。

臣聞良宰謀朝不必借威。貞臣衛主修身則足。是以三晉之彊。屈於齊堂之俎。千乘之勢。弱於陽門之哭。

臣聞赴曲之音。洪細入韻。頓節之容。俯仰依詠。是以言苟適事。精麤可施。士苟適道。修短可命。

臣聞因雲灑潤。則芬澤易流。乘風載響。則音徽自遠。是以德教俟物。而濟榮名。緣時而顯。

臣聞覽影偶質。不能解獨。指跡慕遠。無救於遲。是以循虛器者。非應物之具。翫空言者。非致治之機。

臣聞鑽燧吐火。以續陽谷之晷。揮翮生風。而繼飛廉之功。是以物有微而毗著。事有瑣而助洪。

臣聞春風朝煦。蕭艾蒙其溫。秋霜宵墜。芝蕙被其涼。是故威以齊物。爲肅德以普濟。爲弘

臣聞巧盡於器。習數則貫。道繫於神。人亡則滅。是以輪匠肆目。不乏奚仲之妙。瞽叟清耳。而無伶倫之察。

臣聞性之所期。貴賤同量。理之所極。卑高一歸。是以准月稟水。不能加涼。晞日引火。不必增輝。

臣聞絕節高唱。非凡耳所悲。肆義芳詠。非庸聽所善。是以南荆有寡和之歌。東野有不釋之辯。

臣聞尋煙染芬。薰息猶芳。徵音錄響。操終則絕。何則。垂於世者。可繼。止乎身者。難結。是以玄晏之風。恒存動神之化。已滅

臣聞託闇藏形。不爲巧密。倚智隱情。不足自匿。是以重光發

藻尋虛捕景大人貞觀探心昭武

臣聞披雲看霄則天文清澄風觀水則川流平是以四族放而唐劬二臣誅而楚寧

臣聞音以比耳爲美色以悅目爲歡是以衆聽所傾非假百里之操萬夫婉變非俟西子之顏故聖人隨世以擢佐明主因時而命官

臣聞出乎身者非假物所隆牽乎時者非克已所勗是以利盡萬物不能蔽童昏之心德表生民不能救棲遑之辱

臣聞動循定檢天有可察應無常節身或難照是以整景揆日盈數可期撫臆論心有時而謬

臣聞傾耳求音眊優聽苦澄心徇物形逸神勞是以天殊其

數雖同方不能分其感理塞其通則並質不能共其休

臣聞遁世之士非受匏瓜之性幽居之女非無懷春之情是以名勝欲故偶影之操矜窮愈達故凌霄之節厲

臣聞聽極於音不慕鈞天之樂身足於蔭無假垂天之雲是以蒲密之黎遺時雍之世豐沛之士忘桓撥之君

臣聞飛轡西頓則離朱與矇眊收察懸景東秀則夜光與璣珠匿耀是以才換世則俱困功偶時而並劬

臣聞示應於近遠有可察託驗於顯微或可包是以寸管下俸天地不能以氣欺尺表逾立日月不能以形逃

臣聞絃有常音故曲終則收鏡無畜影故觸形則照是以虛已應物必究千變之容挾情適事不觀萬殊之妙

臣聞祝啟布聲以諧金石之和。鼙鼓疎擊以節繁絃之契。是以經治必宣其通。圖物恒審其會。

臣聞目無嘗音之察。耳無照景之神。故在乎我者不誅之於已。存乎物者不求備於人。

臣聞放身而居。體逸則安。肆口而食。屬厭則充。是以王鮪登俎。不假吞波之魚。蘭膏停室。不思銜燭之龍。

臣聞衝波安流。則龍舟不能以漂。震風洞發。則夏屋有時而傾。何則。牽乎動則靜凝。係乎靜則動貞。是以淫風大行。貞女

蒙冷容之誨。淳化殷流。盜跖挾曾史之情。

臣聞達之所服。貴有或遺。窮之所接。賤而必尋。是以江漢之君。悲其墜屨。少原之婦。哭其亡簪。

臣聞觸非其類。雖疾弗應。感以其方。雖微則順。是以商飈漂山。不與盈尺之雲。谷風乘條。必降彌天之潤。故闡於治者。唱

繁而和。寡審乎物者。力約而功峻。

臣聞煙出於火。非火之和。情生於性。非性之適。故火壯則煙微。性充則情約。是以殷墟有感。物之悲。周京無佇立之跡。

臣聞適物之技。俯仰異用。應事之器。通塞異任。是以鳥棲雲而繳飛。魚藏淵而網沈。賁鼓密而合響。明笛疎而吐音。

臣聞理之所守。勢所常奪。道之所閉。權所必開。是以生重於利。故據圖無揮劍之痛。義貴於身故臨川有投跡之哀。

臣聞通於變者。用約而利博。明其要者。器淺而應玄。是以天地之曠。該於六位。萬殊之曲。窮於五絃。

臣聞圖形於影未盡纖麗之容察火於灰不覩洪赫之烈是以問道存乎其人觀物必造其質
臣聞情見於物雖遠猶疎神藏於形雖近則密是以儀天步
畧而修短可量臨淵揆水而淺深難察
臣聞虐暑熏天不減堅冰之寒涸陰凝地無累陵火之熱是以吞縱之彊不能反蹈海之志漂櫓之威不能降西山之節
臣聞理之所開力所常達數之所塞威有必窮是以烈火流
金不能焚景沈寒凝海不能結風
臣聞足於性者天損不能入貞於期者時累不能淫是以迅
風陵雨不謬晨禽之察勁陰殺節不凋寒木之心

箴類

女史箴

張華

茫茫造化二儀既分散氣流形既陶既甄在帝庖羲肇經天
人爰始夫婦以及君臣家道以正而王猷有倫婦德尚柔含
章貞吉婉嫵淑慎正位居室施衿結褵虔恭中饋肅慎爾儀
式瞻清懿樊姬感莊不食鮮禽衛女矯桓耳忘和音志厲義
高而二主易心玄熊攀檻馮媛趨進夫豈無畏知死不松班
妾有辭割驩同輦夫豈不懷防微慮遠道罔隆而不殺物無
盛而不衰日中則昃月滿則微崇猶塵積替若駭機人咸知
飾其容而莫知飾其性性之不飾或愆禮正斧之藻之克念
作聖出其言善千里應之苟違斯義則同衾以疑出言如微
而榮辱由茲勿謂幽昧靈監無象勿謂玄漠神聽無響無矜

爾榮天道惡盈無恃爾貴隆隆者墜鑒于小星戒彼攸遂此
心蝨斯則繁爾類驪不可以黷寵不可以專專實生慢愛極
則遷致盈必損理有固然美者自美翩以取尤冶容求好君
子所讐結恩而絕職此之由故曰冀冀矜矜福所以興靖恭
自思榮顯所期女史司箴敢告庶姬

封燕然山銘

班固

維永元元年秋七月有漢元舅日車騎將軍竇憲寅亮聖皇
登翼王室納于大麓惟清緝熙乃與執金吾耿秉述職巡禦
治兵于朔方鷹揚之校螭虎之士爰該六師暨南單于東胡
烏桓西戎氐羌侯王君長之羣驍騎十萬元戎輕武長轂四
分雷輜蔽路萬有三千餘乘勒以八陣泣以威神玄甲耀日

朱旗絳天遂凌高闕下雞鹿經磧園絕大漠斬溫禺以釁鼓
血尸逐以染鏑然後四校橫徂星流擘掃蕭條萬里野無遺
寇於是域滅區殫反旆而旋考傳驗圖窮覽其山川遂踰涿
邪跨安侯乘燕然躡冒頓之區落焚老上之龍庭將上以據
高文之宿憤光祖宗之玄靈下以安固後嗣恢拓境宇振大
漢之天聲茲可謂一勞而久逸暫費而永寧也乃遂封山刊
石昭銘盛德其辭曰

鑠王師兮征荒裔勦凶虐兮截海外復其邈兮且地界封神
丘兮建隆嶺熙帝載兮振萬世

座右銘

崔瑗

無道人之短無說己之長施人慎勿念受施慎勿忘世譽不

足慕唯仁爲紀綱。隱心而後動。謗議庸何傷。無使名過實。守
愚聖所藏。在涅貴不緇。曖曖內含光。柔弱生之徒。老氏誠剛
彊。行行鄙夫志。悠悠故難量。慎言節飲食。知足勝不祥。行之
苟有恒。久久自芬芳。

劔閣銘

張載

巖巖梁山積石。峩峩遠屬荆衡。近綴岷嶓。南通印隸。北達褒
斜。狹過彭碣。高踰嵩華。惟蜀之門。作固作鎮。是曰劔閣。壁立
千仞。窮地之險。極路之峻。世濁則逆。道清斯順。閉由往漢。開
自有晉。秦得百二。并吞諸侯。齊得十二。田生獻籌。矧茲狹隘。
土之外區。一人荷戟。萬夫越趨。形勝之地。匪親勿居。昔在武
侯中流。而喜山河之固。見屈吳起。興實在德。險亦難恃。洞庭

孟門二國不祀。自古迄今天命匪易。憑阻作昏。鮮不敗績。公
孫旣滅。劉氏銜璧。覆車之軌。無或重跡。勒銘山阿。敢告梁益。

石關銘

陸倕

昔在舜格。文祖禹至。神宗周變。商俗湯黜。夏政雖革。命殊乎
因襲。揖讓異於干戈。而啓緯冥合。天人啓基。克明俊德。大庇
生民。其揆一也。在齊之季。昏虐君臨。威侮五行。怠棄三正。刑
酷然炭。暴踰膏柱。民怨神怒。衆叛親離。踳地無歸。瞻烏靡託。
於是我皇帝拯之。乃操斗極。把鉤陳翼。百神禔萬福。於是龍
飛黑水。虎步西河。雷動風驅。天行地止。命旅致屯。雲之應登。
壇有降火之祥。龜筮協從。人祇響附。穿胷露頂之豪。其坐椎
髻之長。莫不援旗請奮。執銳爭先。夏首憑固。庸岷負阻。協彼

離心抗茲同德帝赫斯怒秣馬訓兵嚴鼓未通凶渠泥首弘
舸連軸巨檻接艦鐵馬千羣朱旗萬里折簡而禽廬九傳檄
以下湘羅兵不血刃士無遺鏃而樊鄧威懷巴黔底定於是
流湯之黨握炭之徒守似藩籬戰同枯朽革車近次師營商
牧華夷士女冠蓋相望扶老携幼一旦雲集壺漿塞野簞食
盈塗似夏民之附成湯殷士之窺周武安老懷少伐罪弔民
農不遷業市無易賈八方入計四輿奉圖羽檄交馳軍書狎
至一日二日非止萬機而尊嚴之度不訾於師旅淵默之容
無改於行陣計如投水思若轉規策定帷幄謀成几案曾未
浹辰獨夫授首乃焚其綺席棄彼寶衣歸琬臺之珠反諸侯
之玉指麾而四海隆平下車而天下大定拯茲塗炭救此橫

流功均天地明並日月於是仰協三靈俯從億兆受昭華之
玉納龍叙之圖類帝禋宗光有神器升中以祀羣望攝袂而
朝諸夏布教都畿班政方外謀協上策刑從中典南服緩耳
西羈反舌劔騎穹廬之國同川共穴之人莫不屈膝交臂厥
角稽顙鑿空萬里攘地千都幕南罷鄣河西無警於是治定
功成邇安遠肅忘茲鹿駭息此狼顧乃正六樂治五禮改革
程創法律置博士之職而著錄之生若雲開集雅之館而款
關之學如市興建庠序啓設郊丘一介之才必記無文之典
咸秩於是天下學士靡然向風人識廉隅家知禮讓教臻侍
子化洽期門區宇乂安方面靜息役休務簡歲阜民和歷代
規摹前王典故莫不芟夷翦截允執厥中以爲象闕之制其

來已遠。春秋設舊章之教。經禮垂布憲之文。戴記顯游觀之言。周史書樹闕之夢。北荒明月。西極流精。海岳黃金。河庭紫貝。蒼龍玄武之制。銅爵鐵鳳之工。或以聽窮。省寃。或以布治。懸法。或以表正。王居。或以光崇。帝里。晉氏浸弱。宋歷威夷。禮經舊典。寂寥無記。鴻規盛烈。湮沒罕稱。乃假天闕於牛頭。託遠圖於博望。有欺耳目。無補憲章。乃命審曲之官。選明中之士。陳圭置臬。瞻星接地。興復表門。草創華闕。於是歲次天紀。月旅太簇。皇帝御天下之七載也。構茲盛則。興此崇禮。方且趨以表敬。觀而知法。物覩雙碣之容。人識百重之典。作範垂訓。赫矣壯乎。爰命下臣。式銘盤石。其辭曰。惟帝建國。正位辨方。周營洛浹。漢啓岐梁。居因業盛。文以化光。爰有象闕。是惟

舊章。青蓋南泊。黃旗東指。懸法無聞。藏書弗紀。大人造物。龍德休否。建此百常。興茲雙起。偉哉偃蹇。壯矣巍巍。旁映重疊。上連翠微。布教方顯。浹日初輝。懸書有附。委篋知歸。鬱屈重軒。穹隆反宇。形聳飛棟。勢超浮柱。色法上圓。制模下矩。周塋原隰。俛臨煙雨。前賓四會。却背九房。北通二轍。南湊五方。暑來寒往。地久天長。神哉華觀。永配無疆。

新漏刻銘

陸倕

夫自天觀象。昏且之刻未分。治歷明時。盈縮之度無准。挈壺命氏。遠哉義用。揆景測辰。微宮戒井。守以水火。分茲日夜。而司曆亡官。疇人廢業。孟陬殄滅。攝提無紀。衛宏載傳。呼之節較。而未詳霍融。叙分至之差。詳而不密。陸機之賦。虛握靈珠。

孫綽之銘。空檀崑玉弘度遺篇。承天垂旨。布在方冊。無彰器
用。譬彼春華。同夫海棗。寧可以軌物字民。作範垂訓者乎。且
今之官漏。出自會稽。積水違方。導流垂則。六日無辨。五行不
分。歲躔闔茂。月次姑洗。皇帝有天下之五載也。樂遷夏諺。禮
變商俗。業類補天。功均柱地。河海夷晏。風雲律呂。坐朝晏罷。
每且晨興。屬傳漏之音。聽雞人之響。以爲星火。謬中金水。違
用時乖。啓閉箭異。錙銖爰命。日官草創。新器於是。俯察旁羅。
登臺升庫。則于地四參。以天一建。武遺蠹咸和。餘舛金筒。方
圓之制。飛流吐納之規。變律改經。一皆懲革。天監六年。太歲
丁亥。十月丁亥朔。十六日壬寅。漏成進御。以考辰正。晷測表
候。陰不謬圭。撮無乖黍。累又可以校運算之睽。合辨分天之

邪。正察四氣之盈虛。課六歷之疎密。永世貽則。傳之無窮。赫
矣。煥乎無德而稱也。昔嘉量微物。盤盂小器。猶其昭德記功。
載在銘典。况入神之制。與造化合符。成物之能。與坤元等契。
勲倍楹席。事百巾机。寧可使多謝曾水。有陋昆吾。金字不傳。
銀書未勒者哉。乃詔小臣。爲其銘曰。

一暑一寒。有明有晦。神道無跡。天工罕代。乃置挈壺。是惟熙
載。氣均衡石。晷正權槩。世道交喪。禮術銷亡。遽遷水火。爭倒
衣裳。擊刁舛次。叢木乖方。爰究爰度。時惟我皇。方壺外次。圓
流內襲。洪殺殊等。高卑異級。靈虬承注。陰蟲吐喻。倏往忽來。
鬼出神入。微若抽繭。逝如激電。耳不輟音。眼無畱眴。銅史司
刻。金徒抱箭。履薄非兢。臨深罔戰。授受靡訾。登降弗爽。唯精

唯一可法可象月不知來日無藏往分似符契至猶影響合
昏暮卷蕙英晨生尚辨天意猶測地情况我神造通幽洞靈
配皇等極爲世作程

誄類

王仲宣誄并序

曹植

建安二十二年正月二十四日戌申魏故侍中關內侯王君
卒嗚呼哀哉皇穹神察詰人是恃如何靈祇殲我吉士誰謂
不痛早世卽冥誰謂不傷華繁中零存亡分流天遂同期朝
聞夕没先民所思何用誄德表之素旗何以贈終哀以送之
遂作誄曰猗歟侍中遠祖彌芳公高建業佐武伐商爵同齊
魯邦祀絕亡流裔畢萬勲績惟光晉獻賜封于魏之疆天開

之祚末胄稱王厥姓斯氏條分葉散世滋芳烈揚聲秦漢會
遭陽九炎光中矇世祖撥亂爰建時雍三台樹位履道是鍾
寵爵之加匪惠惟恭自君一祖爲光爲龍僉曰休哉宜翼漢
邦或統太尉或掌司空百揆惟敘五典克從天靜人和皇教
遐通伊君顯考奕葉佐時入管機密朝政以治出臨朔岱庶
績咸熙君以淑懿繼此洪基既有令德材技廣宣彊記洽聞
幽讚微言文若春華思若涌泉發言可詠下筆成篇何道不
洽何藝不閑棋局逞巧博奕惟賢皇家不造京室隕顛宰臣
專制帝用西遷君乃羈旅離此阻艱翕然鳳舉遠窺荆蠻身
窮志達居鄙行鮮振冠南嶽濯纓清川潛處蓬室不干勢權
我公奮鉞耀威南楚荆人或違陳戎講武君乃義發算我師

旅高尚霸功。投身帝宇。斯言既發。謀夫是與。是與伊何。響我明德。投戈編都。稽顙漢北。我公定嘉。表揚京國。金龜紫綬。以彰勲則。勲則伊何。勞謙靡已。憂世忘家。殊略卓峙。乃署祭酒。與軍行止。算無遺策。畫無失理。我王建国。百司儻又。君以顯舉。秉機省闈。戴蟬珥貂。朱衣皓帶。入侍帷幄。出擁華蓋。榮耀當世。芳風掩藹。嗟彼東夷。憑江阻湖。騷擾邊境。勞我師徒。光光戎輅。霆駭風徂。君侍華轂。輝耀王塗。思榮懷附。望彼來威。如何不濟。運極命衰。寢疾彌留。吉往凶歸。嗚呼哀哉。翩翩孤嗣。號慟崩摧。發軔北魏。遠迄南淮。經歷山河。泣涕如頽。哀風興感。行雲徘徊。游魚失浪。歸鳥忘栖。嗚呼哀哉。吾與夫子。義貫丹青。好和琴瑟。分過友生。庶幾遐年。攜手同征。如何奄忽。

棄我夙零。感昔宴會。志各高厲。予戲夫子。金石難敝。人命靡常。吉凶異制。此驩之人。孰先隕越。何寤夫子。果乃先逝。又論死生存亡。數度子猶懷疑。求之明據。儻獨有靈。游魂泰素。我將假翼。飄颻高舉。超登景雲。要子天路。喪柩旣臻。將反魏京。靈輜廻軌。白驥悲鳴。虛廓無見。藏景蔽形。孰云仲宣。不聞其聲。延首歎息。雨泣交頸。嗟乎夫子。永安幽冥。人誰不沒。達士狗名。生榮死哀。亦孔之榮。嗚呼哀哉。

楊荊州誄 并序

潘岳

維咸寧元年。夏四月乙丑。晉故折衝將軍荊州刺史東武戴侯榮陽楊使君薨。嗚呼哀哉。夫天子建国。諸侯立家。選賢與能。政是以和。周賴尚父。殷憑太阿。矯矯楊侯。晉之爪牙。忠節

文選正效 卷之十一
克明茂績惟嘉將宏王畧肅清荒遐降年不永玄首未華銜
恨沒世命也奈何嗚呼哀哉自古在昔有生必死身沒名垂
先哲所遺行以號彰德以述美敢託旒旗爰作斯誄其辭曰
邈矣遠祖系自有周昭穆繁昌枝庶分流族始伯喬氏出楊
侯奕世丕顯允廸大猷天厭漢德龍戰未分伊君祖考方事
之殷鳥則擇木臣亦簡君投心外朝策名委身奮躍淵塗跨
騰風雲或統驍騎或據領軍篤生戴侯茂德繼期纂戎洪緒
克構堂基弱冠味道無競惟時孝實蒸蒸友亦怡怡多才豐
藝彊記洽聞日睎毫末心算無垠草隸兼善尺牘必珍足不
輟行手不釋文翰動若飛紙落如雲學優則仕乃從王政散
璞發輝臨軼作令化行邑里惠洽百姓越登司官肅我朝命

惟此大理國之憲章君泄其任視民如傷庶獄明慎刑辟端
詳聽參臯呂稱侔于張改授農政于彼野王倉盈庾億國富
兵彊煌煌文后鴻漸晉室君以兼資參戎作弼用錫土宇膺
茲顯秩青社白茅亦朱其紱魏氏順天聖皇受終烈烈楊侯
實統禁戎司管閩闔清我帝宮苛慝不作穆如和風謂督勳
勞班命彌崇茫茫海岱玄化未周泊泊江漢疆場分流秉文
兼武時惟楊侯既守東莞乃牧荊州折衝萬里對揚王休聞
善若驚疾惡如讐示威示德以伐以柔吳夷凶侈僞師畏逼
將乘讐釁席卷南極繼褰糧盡神謀不忒君子之過引曲推
直如彼日月有時則食負執其咎功讓其力亦既旋旆爲法
受黜退守丘塋杜門不出游日典墳縱心儒術祗祗搢紳升

堂入室靡事不咨無疑不質位貶道行身窮志逸弗慮弗圖
乃寢乃疾昊天不弔景命其卒嗚呼哀哉子囊佐楚遺言城
郢史魚諫衛以尸顯政伊君臨終不忘忠敬寢伏牀蓐念在
朝廷朝達厥辭夕隕其命聖王嗟悼寵贈衾綈誄德策勲考
終定謚羣辟慟懷邦族揮淚孤嗣在疚寮屬含悴赴者同哀
路人增歎嗚呼哀哉余以頑蔽覆露重陰仰追先考執友之
心俯感知已識達之深承諱切怛涕淚霑襟豈忘載奔憂病
是沈在疾不省於亡不臨舉聲增慟哀有餘音嗚呼哀哉

楊仲武誄

并序

潘岳

楊經字仲武滎陽宛陵人也中領軍肅侯之曾孫荊州刺史
戴侯之孫東武康侯之子也八歲喪父其母鄭氏光祿勳密

陵成侯之元女操行甚高恤養幼孤以保父夫家而免諸艱
難戴侯康侯多所論著又善草隸之藝子以妙年之秀固能
綜覽義旨而軌式模範矣雖舅氏隆盛而孤貧守約心安陋
巷體服菲薄余甚奇之若乃清才儁茂盛德日新吾見其進
未見其已也既籍三葉世親之恩而子之姑余之伉儷焉往
歲卒於德宮里喪服周次綢繆累月苟人必有心此亦款誠
之至也不幸短命春秋二十九元康九年夏五月己亥卒嗚
呼哀哉乃作誄曰

伊子之先奕葉熙隆惟祖惟曾載揚休風顯考康侯無祿早
終名器雖光勲業未融篤生吾子誕茂淑姿克岐克嶷知章
知微鉤深探曠味道研幾匪直也人邦家之輝子之邁閔曾

未齒髻如彼危根當此衝颺德之休明靡幽不喬弱冠流芳
儻聲清劭爾舅惟榮爾宗惟粹幼秉殊操違豐安匱撰錄先
訓俾無隕墜舊文新藝罔不必肄潘楊之穆有自來矣矧乃
今日慎終如始爾休爾戚如實在已視予猶父不得猶子敬
亦既篤愛亦既深雖殊其年實同厥心日昃景西望子朝陰
如何短折背世湮沈嗚呼哀哉寢疾彌留守茲孝友臨命忘
身顧戀慈母哀哀慈母痛心疾首噉噉同生悽悽諸舅春蘭
擢莖方茂其華荆寶挺璞將剖于和含芳委耀毀壁摧柯嗚
呼仲武痛哉奈何德宮之艱同次外寢惟我與爾對筵接枕
自時迄今曾未盈稔姑姪繼隕何痛斯甚嗚呼哀哉披帙散
書屢覩遺文有造有寫或草或真執玩周復想見其人紙勞

夏侯常侍誄

潘岳

于手涕霑于巾龜筮既襲塋隧既開痛矣楊子與世長乖朝
濟洛川夕次山隈歸鳥頡頏行雲徘徊臨穴永訣撫櫬盡哀
遺形莫紹增慟余懷魂兮往矣梁木實摧嗚呼哀哉

夏侯湛字孝若譙國譙人也少知名弱冠辟太尉府掾賢良
方正徵爲太子舍人尚書郎野王令中書郎南陽相家艱乞
還頃之選爲太子僕未就命而世祖崩天子以爲散騎常侍
從班列也春秋四十有九元康元年夏五月壬辰寢疾卒于
延喜里第嗚呼哀哉乃作誄曰

禹錫玄珪實曰文命克明克聖光啓夏政其在于漢邁勳惟
嬰思弘儒業小大雙名顯祖曜德牧究及荆父守淮岱治亦

有聲。英英夫子，灼灼其儁。飛辯摘藻，華繁玉振。如彼隋和，發彩流潤。如彼錦績，列素點絢。人見其表，莫測其裏。徒謂吾生文勝，則史心照。神交唯我，與子且歷。少長逮觀，終始子之承親。孝齊閔參，子之友悌。和如瑟琴，事君直道。與朋信心，雖實唱高，猶賞爾音。弱冠厲翼，羽儀初升。公弓既招，皇輿乃徵。內贊兩宮，外宰黎蒸。忠節允著，清風載興。泱彼樂都，寵子惟王。設官建輔，妙簡邦良。用取喉舌，相爾南陽。惠訓不倦，視人如傷。乃眷北顧，辭祿延喜。余亦偃息，無事明時。疇昔之游，二紀于茲。斑白攜手，何歡如之。居吾語女，衆實勝寡。人惡儁異，俗疵文雅。執戟疲揚，長沙投賈。無謂爾高，恥居物下。子乃洗然變色，易容慨然。歎曰：道固不同，爲仁由已。匪我求蒙，誰毀誰

譽。何去何從，莫涅匪緇。莫磨匪磷，子獨正色。居屈志申，雖不爾以。猶致其身，獻替盡規。媚茲一人，讜言忠謀。世祖是嘉，將僕儲皇。奉轡承華，先朝末命。聖列顯加入侍，帝闕出光。厥家我聞，積善神降之吉。宜享遐紀，長保天秩。如何斯人而有斯疾，曾未知命。中年隕卒，嗚呼哀哉。惟爾之存，匪爵而貴。其食美服，重珍兼味。臨終遺誓，永錫爾類。歛以時襲，殯不簡器。誰能拔俗，生盡其養。孰是養生而薄其葬，淵哉若人。縱心條暢，傑操明達。困而彌亮，樞輅既祖。容體長歸，存亡永訣。逝者不追，望子舊車。覽爾遺衣，幅抑失聲。迸涕交揮，非子爲慟。吾慟爲誰。嗚呼哀哉。日往月來，暑退寒襲。零露霑凝，勁風淒急。慘爾其傷，念我良執。適子素館，撫孤相泣。前思未弭，後感仍集。

積悲滿懷逝矣安及嗚呼哀哉

馬汧督誄并序

潘岳

惟元康七年秋九月十五日晉故督守關中侯扶風馬君卒。嗚呼哀哉。初雍部之內屬羌反。未弭而編戶之氏又肆逆焉。雖王旅致討。終於殄滅。而蜂蠆有毒。驟失小利。俾百姓流亡。頻於塗炭。建威喪元於好時。州伯宵遯。乎大谿。若夫偏師裨將之隕首覆軍者。蓋以十數。剖符專城。紆青拖墨之司。奔走失其守者。相望於境。秦隴之僭。鞏更爲魁。旣已襲汧而館其縣。子以眇爾之身。介乎重圍之裏。率寡弱之衆。據十雉之城。羣氏如蝟毛而起。四面雨射城中。城中鑿穴而處。負戶而汲。木石將盡。樵蘇乏竭。芻蕘罄絕。於是乎發梁棟而用之。芻以

鐵鑠機關。旣縱礮而又升焉。爨陳焦之麥。枿枵桷之松。用能薪芻不匱。人畜取給。青煙傍起。歷馬長鳴。凶醜駭而疑懼。乃闕地而攻。子命穴浚。塹寘壺。鑄瓶甒以偵之。將穿城響作。因焚穢火。薰之潛氏。穢焉久之。安西之救至。竟免虎口之厄。全數百萬石之積。文契書於幕府。聖朝疇咨。進以顯秩。殊以幢蓋之制。而州之有司。乃以私隸數口。穀數十斛。考訊吏兵。以積楚之辭。連之大將軍。屢抗其疏。曰。敦固守孤城。獨當羣寇。以少禦衆。載離寒暑。臨危奮節。保穀全城。而雍州從事。忌敦勲效。推極小疵。非所以褒獎元功。宜解敦禁劾。假授詔書。遽許。而子固已下獄。發憤而卒也。朝廷聞而傷之。策書曰。皇帝咨故督守關中侯馬敦。忠勇果毅。率勵有方。固守孤城。危逼

獲濟寵秩未加不幸喪亡朕用悼焉今追贈牙門將軍印綬
祠以少牢魂而有靈嘉茲寵榮然絜士之間穢其庸致思乎
若乃下吏之肆其噤害則皆妬之徒也嗟乎妬之欺善抑亦
賢首之讐也語曰或戒其子慎無爲善言因可以若是悲夫
昔乘丘之戰縣賁父御魯莊公馬驚敗績賁父曰他日未嘗
敗績而今敗績是無勇也遂死之國人浴馬有流矢在白肉
公曰非其罪也乃誅之漢明帝時有司馬叔持者白日於都
市手劔父讐視死如歸亦命史臣班固而爲之誄然則忠孝
義烈之流慷慨非命而死者綴辭之士未之或遺也天子旣
已策而贈之微臣託乎舊史之末敢闕其文哉乃作誄曰知
入未易人未易知嗟茲馬生位未名卑西戎猾夏乃奮其奇

保此泝城救我邊危彼邊奚危城小粟富子以眇身而裁其
守兵無加衛墉不增築焚焚羣狄豺虎競逐鞏更恣睢潛時
官寺齊萬虓闕震驚台司聲勢沸騰種落煽熾旌旗電舒戈
矛林植彤珠星流飛矢雨集惴惴士女號天以泣爨麥而炊
負戶以汲累卵之危倒懸之急馬生爰發在險彌亮精貫白
日猛烈秋霜稜威可厲懦夫克壯霑恩撫循寒士挾纊蠢蠢
犬羊阻衆陵寡潛隧密攻九地之下愜愜窮城氣若無假昔
命懸天今也惟馬惟此馬生才博智瞻偵以瓶壺則以長漣
鋪未見鋒火以起焰薰尸滿窟措穴以斂木石匱竭其稔空
虛矧然馬生傲若有餘矧梁爲礮柝松爲芻守不乏械櫪有
鳴駒哀哀建威身伏斧質悠悠烈將覆軍喪器戎釋我徒顯

誅我師以生易死疇克不一聖朝西顧關右震惶分我汧庾
化爲寇糧實賴夫子思暮彌長咸使有勇致命知方我雖未
學聞之前典十世宥能表墓旌善思人愛樹甘棠勿翦矧乃
吾子功深疑淺兩造未具儲隸蓋豈孰是勲庸而不獲免猶
哉部司其心反側斲善害能醜正惡直牧人逶迤自公退食
聞穢鷹揚曾不戢翼忘爾大勞猜爾小利苟莫開懷于何不
至慨慨馬生碾碾高致發憤因圖沒而猶眠嗚呼哀哉安平
出奇破齊克完張孟運籌危趙獲安汧人賴子猶彼談單如
何吝嫉搖之筆端傾倉可賞矧云私粟狄隸可殞况曰家僕
剔子雙龜貫以三木功存汧城身死汧獄凡爾同圍心焉摧
割扶老攜幼街號巷哭嗚呼哀哉明明天子旌以殊恩光光
寵贈乃牙其門司勲班爵亦兆後昆死而有靈庶慰冤魂嗚
呼哀哉

陽給事誄并序

顏延之

惟永初三年十一月十一日宋故寧遠司馬濮陽太守彭城
陽君卒嗚呼哀哉瓚少稟志節資性忠果奉上以誠率下有
方朝嘉其能故授以邊事永初之末佐守滑臺值國禍薦臻
王略中否獯虜聞釁剝司寇幽并騎弩屯逼鞏洛列營緣
戍相望屠潰瓚奮其猛銳志不違難立乎將率之間以緝華
裔軍爭免而瓚誓命沈城佻身飛鏃兵盡器竭斃于旗下非
夫貞壯之氣勇烈之志豈能臨敵引義以死殉節者哉景平

之元。朝廷聞而傷之。有詔曰。故寧遠司馬濮陽太守陽瓚滑
臺之逼。厲城固守。投命殉節。在危無撓。古之烈士。無以加之。
可贈給事中。振卹遺孤。以慰存亡。追寵旣彰。人知慕節。河汴
之間。有義風矣。逮元嘉廓祚。聖神紀物。光昭茂緒。旌錄舊勲。
苟有槩於貞孝者。實事感於仁明。末臣蒙固側聞。至訓敢詢。
諸前典而爲之誄。其辭曰。

貞不常祐。義有必甄。處父勤君。怨在登賢。苦夷攻果。題于行
間。忠壯之烈。宜自爾先。舊勲雖廢。邑氏遂傳。惟邑及氏。自溫
徂陽。狐續旣降。晉族弗昌。昌之子之生。立績宋皇。拳猛沈毅。溫
敏肅良。如彼竹柏。負雪懷霜。如彼駢駟。配服驂衡。邊兵喪律。
王略未恢。函陝堙阻。瀝洛蒿萊。朔馬東驚。胡風南埃。路無歸

轉野有委骸。帝圖斯艱。簡兵授才。定命陽子。佐師危臺。憬彼
危臺。在滑之垆。周衛是交。鄭翟是爭。昔惟華國。今實邊亭。憑
巘結關。負河縈城。金柝夜擊。和門晝扃。料敵厭難。時惟陽生。
涼冬氣勁。塞外草衰。邊矣獯虜。乘障犯威。鳴驥橫厲。霜鏑高
聳。軼我河縣。俘我洛畿。攢鋒成林。投鞍爲圍。翳翳窮壘。嗷嗷
羣悲。師老變形。地孤援闕。卒無半菽。馬實拊秣。守未焚衝。攻
已濡褐。烈烈陽子。在困彌達。勉慰痍傷。拊巡饑渴。力雖可窮。
氣不可奪。義立邊疆。身終鋒楛。嗚呼哀哉。貴父隕節。魯人是
志。汧督效貞。晉策攸記。皇上嘉悼。思存寵異。于以贈之。言登
給事。疏爵紀庸。恤孤表嗣。嗟爾義士。沒有餘喜。嗚呼哀哉。

陶徵士誄并序

顏延之

夫璿玉致美不爲池隍之寶桂椒信芳而非園林之實豈期
深而越遠哉蓋云殊性而已故無足而至者物之藉也隨踵
而立者人之薄也若乃巢高之抗行夷皓之峻節故已父老
堯禹錙銖周漢而綿世浸遠光靈不屬至使菁華隱沒芳流
歇絕不其惜乎雖今之作者人自爲量而首路同塵輟塗殊
軌者多矣豈所以昭末景泛餘波有晉徵士尋陽陶淵明南
岳之幽居者也弱不好弄長實素心學非稱師文取指達在
衆不失其寡處言逾見其默少而貧病居無僕妾井臼弗任
藜藿不給母老子幼就養勤匱遠惟田生致親之議追悟毛
子捧檄之懷初辭州府三命後爲彭澤令道不偶物棄官從
好遂乃解體世紛結志區外定跡深棲於是乎遠灌畦鬻蔬

爲供魚菽之祭織絢緯蕭以充糧粒之費心好異書性樂酒
德簡棄煩促就成省曠殆所謂國爵屏貴家人忘貧者歟有
詔徵著作郎稱疾不到春秋若干元嘉四年月日卒于尋陽
縣之某里近識悲悼遠士傷情冥默福應嗚呼淑貞夫實以
誅華名由謚高苟允德義貴賤何算焉若其寬樂令終之美
好廉克已之操有合謚典無愆前志故詢諸友好宜謚曰靖
節徵士其辭曰

物尚特生人固介立豈伊時邁曷云世及嗟乎若士望古遙
集韜此洪族茂彼名級睦親之行至自非敦然諾之信重於
布言廉深簡潔貞夷粹溫而能峻博而不繁依世尚同詭
時則異有一於此兩非默置豈若夫子因心違事畏榮好古

薄身厚志世霸虛禮州壤推風孝惟義養道必懷邦人之秉
彝不隘不恭爵同下士祿等上農度量難鈞進退可限長卿
棄官稚賓自免子之悟之何悟之辨賦詩歸來高蹈獨善亦
既超曠無適非心汲流舊嚙葺字家林晨煙暮靄春煦秋陰
陳書輟卷置酒絃琴居備勤儉躬兼貧病人否其憂子然其
命隱約就閑遷延辭聘非直也明是惟道性糾纏幹流冥漠
報施孰云與仁實疑明智謂天蓋高胡堡斯義履信曷憑思
順何寘年在中身疾維疴疾視死如歸臨凶若吉藥劑弗嘗
禱祀非恤僚幽告終懷和長畢嗚呼哀哉敬述靖節式尊遺
占存不願豐沒無求瞻省計却賻輕哀薄斂遭壤以穿旋葬
而窆嗚呼哀哉深心追往遠情逐化自爾介居及我多暇伊

好之洽接閭隣舍宵盤畫憇非舟非駕念昔宴私舉觴相誨
獨正者危至方則闕哲人卷舒布在前載取鑒不遠吾規子
佩爾實愀然中言而發違衆速尤迕風先歷身才非實榮聲
有歇叡音永矣誰箴余闕嗚呼哀哉仁焉而終智焉而斃黔
婁既沒展禽亦逝其在先生同塵往世旌此靖節加彼康惠
嗚呼哀哉

宋孝武宣貴妃誄 并序

謝莊

惟大明六年夏四月壬子宣貴妃薨律谷罷煖龍鄉輟曉照
車去魏連城辭趙皇帝痛掖殿之既闋悼泉途之已宮巡步
檐而臨蕙路集重陽而望椒風嗚呼哀哉天寵方隆玉姬下
姻肅雍揆景陟岵爰臻國軫喪淑之傷家凝賈庇之怨敢撰

德於旂旒庶圖芳於鐘萬其辭曰

玄丘煙燼瑤臺降芬高唐滌雨巫山鬱雲誕發蘭儀光啓玉
慶望月方娥瞻星比發毓德素里棲景宸軒處麗絺綌出懋
蘋蘩修詩賁道稱圖照言翼訓妣幄贊軌堯門綢繆史館容
與經闡陳風緝藻臨彖分微游藝殫數撫律窮機躊躇冬愛
怊悵秋暉展如之華寔邦之媛敬懃顯陽肅恭崇憲奉榮維
約承慈以遂逮下延和臨朋違怨祚靈集祉慶藹迎祥皇胤
璿式帝女金相聯跗齊頴接萼均芳以藩以牧燭代輝梁視
朔書氣觀臺告侵八頌局和六祈輟滲衡總滅容翬翟毀社
掩綵瑤光收華紫禁嗚呼哀哉惟軒夕改駟輅晨遷離宮天
邃別殿雲懸靈衣虛襲組帳空煙巾見餘軸匣有遺絃嗚呼

哀哉移氣朔兮變羅紈白露凝兮歲將闌庭樹驚兮中帷響
金釭暖兮玉座寒純孝擗其俱毀共氣摧其同樂仰昊天
莫報怨凱風之徒攀茫昧與善寂寥餘慶喪過于哀棘實滅
性世覆冲華國虛淵令嗚呼哀哉題湊既肅龜筮既辰階撤
兩奠庭引雙輜維慕維愛曰子曰身慟皇情於容物崩列辟
於上旻崇徽章而出寰甸照殊策而去城闈嗚呼哀哉經建
春而右轉循閭闔而逕渡旌委鬱於飛飛龍逶遲於步步鏘
楚挽於槐風喝邊簫於松霧涉姑絲而環迴望樂池而顧慕
嗚呼哀哉晨輻解鳳曉蓋俄金山庭寢日隧路抽陰重扇闕
兮燈已黯中泉寂兮此夜深銷神躬于壤未散靈臆於天溘
響乘氣兮蘭馭風德有遠兮聲無窮嗚呼哀哉

哀類

哀永逝文

潘岳

啓夕兮宵興悲絕緒兮莫承俄龍輻兮門側嗟俟時兮將升
 嫂姪兮憧惶慈姑兮垂矜聞鳴雞兮戒朝咸驚號兮撫膺逝
 日長兮生年淺憂患衆兮歡樂尠彼遙思兮離居歎河廣兮
 宋遠今奈何兮一舉邈終天兮不反盡余哀兮祖之晨揚明
 燎兮援靈輻撤房帷兮席庭筵舉酌觴兮告永遷悽切兮增
 歎俯仰兮揮淚想孤魂兮眷舊宇視倏忽兮若髮鬢徒髮鬢
 兮在慮靡耳目兮一遇停駕兮淹留徘徊兮故處周求兮何
 獲引身兮當去去華輦兮初邁馬廻首兮旋旒風泠泠兮入
 帷雲霏霏兮承蓋鳥俛翼兮忘林魚仰沫兮失瀨悵悵兮遲

遲遵吉路兮凶歸思其人兮已滅覽餘跡兮未夷昔同途兮
 今異世憶舊歡兮增新悲謂原隰兮無畔謂川流兮無岸望
 山兮寥廓臨水兮浩汗視天日兮蒼茫面邑里兮蕭散匪外
 物兮或改固歡哀兮情換嗟潛隧兮既敞將送形兮長往委
 蘭房兮繁華襲窮泉兮朽壤中慕叫兮擗標之子降兮宅兆
 撫靈櫬兮訣幽房棺寘寘兮埏窈窈戶闔兮燈滅夜何時兮
 復曉歸反哭兮殯宮聲有止兮哀無終是乎非乎何遑趨一
 遇今日中既遇日兮無兆曾寤寐兮弗夢既顧瞻兮家道長
 寄心兮爾躬重日已矣此蓋新哀之情然耳渠懷之其幾何
 庶無愧兮莊子

宋文皇帝元皇后哀策文 并序

顏延之

惟元嘉十七年七月二十六日。大行皇后崩于顯陽殿。粵九月二十七日。將遷座于長寧陵。禮也。龍輿繩綯。綽容翟結。駮皇塗。昭列神路。幽巖皇帝親臨。祖饋躬瞻。宵載飾遺儀於組旒。淪徂音乎珩珮。悲黼筵之移御。痛輦祿之重晦。降輿客位。撤奠殯階。乃命史臣累德。述懷其辭曰。

倫昭儷升。有物有憑。圓精初燦。方祗始凝。昭哉世族。祥發慶膺。祕儀景胄。圖光玉繩。昌暉在陰。柔明將進。率禮蹈和。稱詩納順。爰自待年。金聲夙振。亦既有行。素章增絢。象服是加。言觀維則。俾我王風。始基嬪德。惠問川流。芳猷淵塞。方江泳漢。載謠南國。伊昔不造。鴻化中微。用集寶命。仰陟天機。釋位公宮。登耀紫闈。欽若皇姑。允迪前徽。孝達寧親。敬行宗祀。進思

才淑。傍綜圖史。發音在詠。動容成紀。壺政穆宣。房樂韶理。坤則順成。星軒潤飾。德之所屆。惟深必測。下節震騰。上清眺側。有來斯雍。無思不極。謂道輔仁。司化莫晰。象物方臻。眎禋告。疹太和既融。收華委世。蘭殿長陰。椒塗弛衛。嗚呼哀哉。戒涼在埒。杪秋卽窆。霜夜流唱。曉月升魄。八神警引。五輅遷跡。嗷嗷儲嗣。哀哀列辟。灑零玉墀。雨泗丹掖。撫存悼亡。感今懷昔。嗚呼哀哉。南背國門。北首山園。僕人按節。服馬顧轅。遙酸紫蓋。泣素軒滅。綵清都夷體。壽原邑野。淪藹戎夏。悲謹來芳。可述。往駕弗援。嗚呼哀哉。

齊敬皇后哀策文 并序

謝朓

惟永泰元年秋九月朔日。敬皇后梓宮啓。自先塋將祔于某

陵其日至，尊親奉奠。其皇帝乃使兼太尉某設祖於行宮，禮也。翠帟舒阜，玄堂啓扉。俎撤三獻，筵卷六衣。哀子嗣皇帝懷，屢衛而延首，想鷺輅而撫心痛。椒塗之先廓，哀長信之莫臨。身隔兩赴，時無一展。旋詔左言，光敷聖善。其辭曰：帝唐遠曹，御龍遙緒。在秦作劉，在漢開楚。肇惟淑聖，克柔克令。清漢表靈，曾沙膺慶。爰定厥祥，徽音允穆。光華沼沚，榮曜中谷。敬始紘綖，教先種稷。睿問川流，神襟蘭郁。先德韜光，君道方被。于佐求賢，所謁無訛。顧史弘式，陳詩展義。厚下曰仁，藏往伊智。十亂斯俟，四教罔忒。思媚諸姑，貽我嬪則。化自公宮，遠被南國。軒曜懷光，素舒佇德。閔予不祐，慈訓早違。方年冲藐，懷袖靡依。家臻寶業，身嗣昌暉。壽宮寂遠，清廟虛歸。嗚呼哀哉！帝遷明命，民神胥悅。乾景外臨，陰儀內缺。空悲故劍，徒嗟金穴。璋瓚奚獻，禕綸罔設。嗚呼哀哉！馮相告祲，宸駕長往。貽厥遠圖，未命是獎。懷豐沛之綢繆，分背神京之弘敞。陋蒼梧之不從，今遵鮒隅以同壤。嗚呼哀哉！陳象設於園寢，兮耿輿鏐於松楸。望承明而不入兮，度清洛而南游。繼池緯於通軌兮，接龍帷於造舟。廻塘寂其已暮兮，東川澹而不流。嗚呼哀哉！籍闕宮之遠烈兮，聞纘女之遐慶。始協德於蘋蘩兮，終配祀而表命。慕方纒於賜衣兮，哀日隆於撫鏡。思寒泉之罔極兮，託彤管於遺詠。嗚呼哀哉！

碑文類

郭有道碑文 并序

蔡邕

先生諱泰字林宗太原界休人也其先出自有周王季之穆有號叔者定有懿德文王咨焉建國命氏或謂之郭卽其後也先生誕應天衷聰睿明哲孝友溫恭仁篤慈惠夫其器量弘深姿度廣大浩浩焉汪汪焉奧乎不可測已若乃砥節礪行直道正辭貞固足以幹事隱括足以矯時遂考覽六經探綜圖緯周流華夏隨集帝學收文武之將墜拯微言之未絕于時纓綬之徒紳珮之士望形表而影附聆嘉聲而響和者猶百川之歸巨海鱗介之宗龜龍也爾乃潛隱衡門收朋勤誨童蒙賴焉用祛其蔽州郡聞德虛已備禮莫之能致羣公休之遂辟司徒掾又舉有道皆以疾辭將蹈鴻涯之遐跡紹巢許之絕軌翔區外以舒翼超天衢以高峙稟命不融享年

四十有二以建寧二年正月乙亥卒凡我四方同好之人永懷哀悼靡所寘念乃相與惟先生之德以謀不朽之事僉以爲先民旣沒而德音猶存者亦賴之於見述也今其如何而闕斯禮於是樹碑表墓昭銘景行俾芳烈奮于百世令聞顯於無窮其辭曰於休先生明德通玄純懿淑靈受之自天崇壯幽浚如山如淵禮樂是悅詩書是敦匪惟撫華乃尋厥根宮牆重仞允得其門懿乎其純確乎其操洋洋搢紳言觀其高棲遲泌丘善誘能教赫赫二事幾行其招委辭召貢保此清妙降年不永民斯悲悼爰勒茲銘摛其光曜嗟爾來世是則是效

陳太丘碑文 并序

蔡邕

先生諱寔字仲弓潁川許人也。含元精之和應期運之數兼資九德總脩百行於鄉黨則恂恂焉。彬彬焉。善誘善導仁而愛人使夫少長咸安懷之。其爲道也。用行舍藏進退可度不徼許以干時不遷怒以臨下。四爲郡功曹五辟豫州六辟三府再辟大將軍宰聞喜牛歲太丘一年德務中庸教敦不肅政以禮成化行有謚會遭黨事禁錮二十年。樂天知命澹然自逸交不諂上愛不瀆下見機而作不俟終日及文書赦宥時年已七十遂隱丘山懸車告老四門備禮閑心靜居大將軍何公司徒袁公前後招辟使人曉喻云欲特表便可入踐常伯超補三事紆佩金紫光國垂勳先生曰絕望已久飾巾待期而已皆遂不至弘農楊公東海陳公每在袞職羣寮賀

之皆舉手曰潁川郡陳君絕世超倫大位未躋慙於文仲竊位之負故時人高其德重乎公相之位也年八十有三中平三年八月丙午遭疾而終臨沒顧命畱葬所卒時服素棺擲財周觀喪事唯約用過乎儉羣公百寮莫不咨嗟巖數知名失聲揮涕大將軍弔祠錫以嘉謚曰徵士陳君稟岳瀆之精苞靈曜之純天不憖遺老俾屏我王梁崩哲萎于時靡憲搢紳儒林論德謀跡謚曰文範先生傳曰郁郁乎文哉書曰洪範九疇彝倫攸敘文爲德表範爲士則存誨沒號不亦宜乎三公遣令史祭以中牢刺史敬弔太守南陽曹府君命官作誄曰赫矣陳君命世是生含光醇德爲士作程資始旣正守終又令奉禮終沒休矣清聲遣官屬掾吏前後赴會刊石作

銘府丞與比縣會葬。荀慈、明韓元長等五百餘人，總麻設位，哀以送之。遠近會葬，千人已上。河南尹种府君臨郡，追歎功德，述錄高行，以爲遠近鮮能及之。重部大掾以成時銘，斯可謂存榮沒哀，死而不朽者已。乃作銘曰：峩峩崇嶽，吐符降神。於皇先生，抱寶懷珍。如何昊穹，既喪斯文。微言絕來者，曷聞交交黃鳥，爰集于棘。命不可贖，哀何有極。

褚淵碑文 并序

王儉

夫太上有立德，其次有立功，此之謂不朽。所以子產云：「宜尼泣其遺愛，隨武既沒，趙文懷其餘風於文簡公見之矣。」公諱淵，字彥回，河南陽翟人也。微子以至仁開基，宋段以功高命氏，爰逮兩漢，儒雅繼及。魏晉以降，奕世重暉。乃祖太傅元

穆公，德合當時，行比州壤，深識臧否，不以毀譽形言。亮采王室，每懷冲虛之道，可謂婉而成章，志而晦者矣。自茲厥後，無替前規，建官惟賢，軒冕相襲。公稟川嶽之靈，暉含珪璋而挺驥，和順內凝，英華外發，神茂初學，業隆弱冠。是以仁經義緯，敦穆於閨庭，金聲玉振，寥亮於區宇。孝敬淳深，率由斯至，盡歡朝夕，人無間言。逍遙乎文雅之圃，翱翔乎禮樂之場。風儀與秋月齊明，音徽與春雲等潤。韻宇弘深，喜愠莫見，其際心明通亮，用人言必猶於已。汪汪焉洋洋焉，可謂澄之不清，撓之不濁。袁陽源才氣高奇，綜覈精裁，宋文帝端明臨朝，鑒賞無昧。袁既延譽於遐邇，文亦定婚於皇家。選尚餘姚公主，拜駙馬都尉。漢結叔高，晉姻武子，方斯蔑如也。釋褐著作佐郎。

轉太子舍人濯纓登朝冠冕當世升降兩宮實惟時寶具瞻
之範既著台衡之望斯集出參太宰軍事入爲太子洗馬俄
遷祕書丞贊道槐庭司文天閣光昭諸侯風流籍甚以父憂
去職喪過乎哀幾將毀滅有識留感行路傷情服闋除中書
侍郎王言如絲其出如綸恪居官次智效惟穆于時新安王
寵冠列蕃越敷邦教毗佐之選妙盡國華出爲司徒右長史
轉尚書吏部郎執銓以平御煩以簡裴楷清通王戎簡要復
存於茲泰始之初入爲侍中曾不移朔遷吏部尚書是時天
步初夷王途尚阻元戎啓行衣冠未緝內贊謀謨外康流品
制勝旣遠涇渭斯明賞不失勞舉無失德績簡帝心聲敷物
聽事寧領太子右衛率固讓不拜尋領驍騎將軍以帷幄之

功膺庸祗之秩封零都縣開國伯食邑五百戶旣秉辭梁之
分又懷寢丘之志所受田邑不盈百井久之重爲侍中領右
衛將軍盡規獻替均山甫之庸緝熙王旅兼方叔之望丹陽
京輔遠近攸則吳興襟帶實惟股肱頻作一守並加蠙冕政
以禮成民是以息明皇不豫儲后幼冲貽厥之寄允屬時望
徵爲吏部尚書領衛尉固讓不拜改授尚書右僕射端流平
衡外寬內直弘二八之高暮宜由庚而垂詠太宗卽世遺命
以公爲散騎常侍中書令護軍將軍送往事居忠貞允亮秉
國之均四方是維百官象物而動軍政不戒而備公之登秦
階而尹天下君子以爲美談亦猶孟軻致欣於樂正羊職悅
賞於士伯者也丁所生母憂謝職毀疾之重因心則至朝議

以有爲爲之魯侯垂式存公忘私力進明准爰降詔書敦還攝任固請移歲表奏相望事不我與屈已弘化屬值三季在辰戚藩內侮桂陽失圖窺窬神器鼓棹則滄波振蕩建旗則日月蔽虧出江派而風翔入京師而雷動鳴控絃於宗稷流鋒鏃於象魏雖英宰臨戎元渠時殄而餘黨寔繁宮廟憂逼公乃總熊羆之士率不貳心之臣戮力盡規克寧禍亂康國祚於綴旒拯王維於已墜誠由太祖之威風抑亦仁公之翼佐可謂德刑詳禮義信戰之器也以靜難之功進爵爲侯兼授尚書令中軍將軍給班劍二十人功成弗有固秉撝挹改授侍中中書監護軍如故又以居母艱去官雖事緣義感而情均天屬顏丁之合禮二連之善喪亦曷以踰天厭宋德水

運告謝嗣主荒怠於天位疆臣憑陵於荆楚廢昏繼統之功龕亂寧民之德公實仰贊宏規參聞神算雖無受脤出車之庸亦有甘寢秉羽之績乃作司空山川攸序兼授衛軍戎政輯睦旣而齊德龍興順皇高禪浚達先天之運匡贊奉時之業弼諧允正徽猷弘遠樹之風聲著之話言亦猶稷契之臣虞夏荀裴之奉魏晉自非坦懷至公永監崇替孰能光輔五君夤亮二代者哉大啓南康爰登中鉉時膺土宇固辭邦教今之尚書令古之冢宰雖秩輕於衮司而任隆於百辟釐遂冲旨改授朝端邇無異言遠無異望帝嘉茂庸重申前冊執五禮以正民簡八刑而罕用故能騁績康衢延慈哲后義在資敬情同布衣出陪鑿躅入奉帷殿仰南風之高詠餐東野

之祕寶雅議於聽政之晨披文於宴私之夕參以酒德間以
琴心暇有餘暉遙然畱想君垂冬日之溫臣盡秋霜之戒肅
肅焉穆穆焉於是見君親之同致知在三之如一太祖升遐
綢繆遺寄以侍中司徒錄尚書事稟玉几之顧奉綬衣之禮
擇皇齊之令典致聲化於雍熙內平外成實昭舊職增給班
劍三十人物有其容徽章斯允位尊而禮卑居高而思降自
夏徂秋以疾陳退朝廷重違謙光之旨用申超世之尚改授
司空領驃騎大將軍侍中錄尚書如故景命不永大漸彌留
建元四年八月二十一日薨於私第春秋四十有八昔柳莊
疾棘衛君當祭而輟禮晏嬰既往齊君趨車而行哭公之云
亡聖朝震悼於上羣后恇慟於下豈惟哀纏一國痛深一主

而已哉追贈太宰侍中錄尚書如故給節羽葆鼓吹班劍爲
六十人謚曰文簡禮也夫乘德而處萬物不能害其貞虛已
以游當世不能擾其度均貴賤於條風忘榮辱於彼我然後
可兼善天下聊以卒歲經始圖終式免祗悔誰云克備公實
有焉是以義結君子惠霑庶類言象所未形述詠所不盡故
吏某甲等感逝川之無捨哀清暉之眇默餐輿誦於丘里瞻
雅詠於京國思衛鼎之垂文想晉鐘之遺則方高山而仰止
刊玄石以表德其辭曰

辰精感運昴靈發祥元首惟明股肱惟良天鑑睿曜踵武前
王欽若元輔體微知章永言必孝因心則友仁洽兼濟愛深
善誘觀海齊量登嶽均厚五臣茲六八元斯九丙暮帷幄外

曜台階遠無不肅邇無不懷如風之偃如樂之諧光我帝典
緝彼民黎率禮蹈謙諒實身幹跡屈朱軒志隆衡館眇眇玄
宗萋萋辭翰義既川流文亦霧散嵩構云積梁陰載缺德猷
靡嗣儀形長遞悵悵餘徽鏘洋遺烈久而彌新用而不竭

頭陀寺碑文

王巾

蓋聞挹朝夕之池者無以測其淺深仰蒼蒼之色者不足知
其遠近况視聽之外若存若亡心行之表不生不滅者哉是
以掩室摩竭用啓息言之津杜口毗邪以通得意之路然詔
彝倫者必求宗於九疇談陰陽者亦研幾於六位是故三才
既辨識妙物之功萬象已陳悟太極之致言之不可以已其
在茲乎然爰繫所登窮於此域則稱謂所絕形乎彼岸矣彼

岸者引之於有則高謝四流推之於無則俯弘六度名言不
得其性相隨迎不見其終始不可以學地知不可以意生及
其涅槃之蘊也夫幽谷無私有至斯響洪鐘虛受無來不應
況法身圓對規矩冥立一音稱物宮商潛運是以如來利見
迎維託生王室憑五衍之軼拯溺逝川開八正之門大庇交
喪於是玄關幽鍵感而遂通遙源濬波酌而不竭行不捨之
檀而施洽羣有唱無緣之慈而澤周萬物演勿照之明而鑒
窮沙界導亡機之權而功濟塵劫時義遠矣能事畢矣然後
拂衣雙樹脫屣金沙惟恍惟惚不皦不昧莫繫於去來復歸
於無物因斯而談則棲遑大千無爲之寂不撓焚燎堅林不
盡之靈無歇大矣哉正法既沒象教陵夷穿鑿異端者以違

方爲得一順非辯僞者比微言於目論於是馬鳴幽讚龍樹
虛求並振頽綱俱維絕紐蔭法雲於真際則火宅晨涼囉慧
日於康衢則重昏夜曉故能使二十七品有樽俎之師九十
六種無藩籬之固既而方廣東被教肆南移周魯二莊親昭
夜景之鑒漢晉兩明並勒丹青之飾然後遺文間出列刹相
望澄什結轍於山西林遠肩隨乎江左矣頭陀寺者沙門釋
慧宗之所立也南則大川浩汗雲霞之所沃蕩北則層峰削
成日月之所迴薄西眺城邑百雉紆餘東望平臯千里超忽
信楚都之勝地也宗法師行絜珪璧擁錫來游以爲宅生者
緣業空則緣廢存軀者惑理勝則惑亡遂欲捨百齡於中身
殉肌膚於猛鷲班荆蔭松者久之宋大明五年始立方丈茅

茨以庇經象後軍長史江夏內史會稽孔府君諱覬爲之薤
草開林置經行之室安西將軍郢州刺史江安伯濟陽蔡使
君諱興宗復爲崇基表剎立禪誦之堂焉以法師景行大迦
葉故以頭陀爲稱首後有僧勤法師貞節苦心求仁養志纂
修堂宇未就而沒高軌難追藏舟易遠僧徒聞其無人椽椽
毀而莫構可爲長太息矣惟齊繼五帝洪名紐三王絕業祖
武宗文之德昭升嚴配格天光表之功弘啓興復是以惟新
舊物康濟多難步中雅頌驟合韶護炎區九譯沙場一候粵
在於建武焉乃詔西中郎將郢州刺史江夏王觀政藩維樹
風江漢擇方城之令典酌龜蒙之故實政肅刑清於是乎在
寧遠將軍長史江夏內史行事彭城劉府君諱誼智刃所遊

文選正文卷之十一
日新月故道勝之韻。虛往實歸。以此寺業廢於已安。功墜於
幾立。慨深覆篲。悲同棄井。因百姓之有餘。問天下之無事。屯
徒揆日。各有司存。於是民以悅來。工以心競。且丘被陵。因高
就遠。層軒延袤。上出雲霓。飛閣逶迤。下臨無地。夕露爲珠。網
朝霞爲丹。艷九衢之草。千計四照之花。萬品崖谷。共清風泉。
相渙金姿。寶相永藉。閑安息心了。義終焉游集。法師釋曇珍。
業行淳修。理懷淵遠。今屈知事任。永奉神居。夫民勞事功。旣
鑲文於鐘鼎。言時稱代。亦樹碑於宗廟。世彌積而功宣。身逾
遠而名紹。敢寓言於彫篆。庶髣髴乎衆妙。其辭曰。
質判玄黃。氣分清濁。涉器千名。含靈萬族。淳源上派。澆風下
驥。愛流成海。情塵爲岳。皇矣能仁。撫期命世。乃覽中土。聿來

迦衛奄有大千。遂荒三界。殷鑒四門。幽求六歲。亦旣成德。妙
盡無爲。帝獻方石。天開淥池。祥河輟水。實樹低枝。通莊九折。
安步三危。川靜波澄。龍翔雲起。耆山廣運。給園多士。金粟來
儀。文殊戾止。應乾動寂。順民終始。法本不然。今則無滅。象正
雖闌。希夷未缺。於昭有齊。式揚洪烈。釋網更維。玄津重柅。惟
此名區。禪慧攸託。倚據崇巖。臨睨通壑。溝池湘漢。堆阜衡霍。
膺膺亭臯。幽幽林薄。媚茲邦后。法流是挹。氣茂三明。情超六
入。眷言靈宇。載懷興葺。丹刻翬飛。輪奐離立。象設旣闕。辟容
已安。桂深冬燠。松疎夏寒。神足游息。靈心往還。勝幡西振。貞
石南刊。

齊故安陸昭王碑文

沈約

公諱緬字景業南蘭陵人也稷契身佐唐虞有大功於天地
商武姬文所以膺圖受籙蕭曹扶翼漢祖滅秦項以寧亂魏
氏時乘於前皇齊握符於後靈源與積石爭流神基與極天
比峻祖宣皇帝雄材盛烈名蓋當時考景皇帝含道居貞卷
懷前代公含辰象之秀德體河岳之上靈氣蘊風雲身負日
月立行可模置言成範英華外發清明內昭天經地義之德
因心必盡簡久遠大之方率由斯至摺其源者游泳而莫測
懷其道者日用而不知昭昭若三辰之麗于天滔滔猶四瀆
之紀于地六幽允洽一德無爽萬物仰之而彌高千里不言
而斯應若夫彈冠出仕之日登庸蒞事之年軍麾命服之序
監督方部之數斯固國史之所詳今可得而畧也永德方衰

天命未改太祖龍躍俟時作鎮淮泗如仁夕惕之志中夜九
迴龕世拯亂之情獨用懷抱深圖密慮衆莫能窺公陪奉朝
夕從容左右蓋同王子洛濱之歲實惟辟疆內侍之年起予
聖懷發言中旨始以文學游梁俄而入掌綸誥蘭桂有芬清
暉自遠帝出于震日衣青光方軌茅社俾侯安陸受瑞析珪
遂荒雲馬式掌儲命帝難其人公以宗室羽儀允膺嘉選協
隆三善仰敷四德博望之苑載暉龍樓之門以峻獻替帷展
實掌喉膺奉待漏之書銜如絲之旨前暉後光非止恒授公
以密戚上賢俄而奉職出納惟允劔璽增華伊昔帝唐九官
咸事熊豹臨猷納言是司自此迄今其任無爽爰自近侍式
贊權衡而皇情眷眷慮深求瘼姑蘇與壤任切關河都會殷

負提封百萬全趙之衮服叢臺方此爲劣臨淄之揮汗成雨
曾何足稱乃鴻鸞舊吳作守東楚弘義讓以勗君子振平惠
以字小人撫同上德綏用中典疑獄得情而弗喜宿訟兩讓
而同歸雖春申之大啓封疆鄧攸之緝熙氓庶不能尚也夏
首藩要任重推轂衿帶中流地殷江漢南接衡巫風雲之路
千里西通鄧鄧水陸之塗三七是惟形勝閩外莫先建麾作
牧明德攸在乃暴以秋陽威以夏日澤無不漸螻蟻之穴靡
遺明無不察容光之微必照由近而被遠自巳而及物惠與
八風俱翔德與五材並運遠無不懷邇無不肅邑居不聞夜
吠之犬牧人不覩晨飲之羊譽表六條功最萬里還居近侍
兼饗戎秩候府寄隆儲端任顯東西兩晉茲選特難羊珍願

言而匪獲謝琰功高而後至升降二宮令績斯俟禁旅尊嚴
主器彌固禹穴神臯地將分陝江左以來常遞斯任東渚距
海南望秦稽淵藪胥萃薈蒲攸在貨殖之民千金比屋郭壘
之內雲屋萬家刑政繁舛舊難詳一南山羣盜未足云多渤
海亂繩方斯易理公下車敷化風動神行誠恕旣孚鉤距靡
用不待赭汗之權而奸渠必翦無假里端之籍而惡子咸誅
被以哀衿孚以信順南陽葦杖未足比其仁穎川時雨無以
豐其澤公攬轡升車牧州典郡感達民祗非待期月老安少
懷塗歌里詠莫不歡若親戚芬若椒蘭麾旆每反行悲道泣
攀車臥轍之戀爭塗忘遠去思一借之情愈久彌結方城漢
池南顧莫重北指嶠潼平塗不過七百西接嶢武關路會不

盈千蠻陬夷徼重山萬里小則俘民略畜大則攻城剽邑晉
宋迄今有切民患烽鼓相望歲時不息椎埋穿掘之黨阡陌
成羣傲法侮吏之人曾莫禁禦累藩咸受其弊歷政所不能
裁加以戎羯窺窬伺我邊際北風未起馬首便以南向塞草
未衰嚴城於焉早閉永明八載疆場大駭天子乃心北眷聽
朝不怡揚旆漢南非公莫可於是驅馬原隰卷甲遄征威令
首塗仁風載路軌躅清晏車徒不擾牛酒日至壺漿塞陌失
義犬羊其來久矣徵賦嚴切唯利是求首鼠疆界災蠹彌廣
公扇以廉風孚以誠德盡任棠置水之情弘郭伋待期之信
金如粟而弗覩馬如羊而靡入雞雉必懷豚魚不爽由是傾
巢舉落望德如歸椎髻鬢首日拜門闕卉服滿塗夷歌成韻

禮義旣敷威刑具舉疆民獷俗反志遷情風塵不起囹圄寂
寞富商野次宿秉停菑蝥蝗弗起豺虎遠跡北狄懼威關塞
謐靜偵諜不敢東窺駝馬不敢南牧方欲振策燕趙席卷秦
代陪龍駕於伊洛侍紫蓋於咸陽而遘疾彌留歛焉大漸耕
夫釋耒桑婦下機參請門衢並走羣望維永明九年夏五月
三十日辛酉薨春秋三十有七城府颯然庶僚如賈男女老
幼大臨街衢接響傳聲不踰時而達于四境夷羣戎落幽遠
必至望城拊膺震動郭邑並求入奉靈輓藩司抑而弗許雖
鄧訓致勞面之哀羊公深罷市之慕對而爲言遠有漸德神
駕東還號送踰境奉觴奠以望靈仰蒼天而自訴震響成雷
盈塗咽水公臨危審正載貽話言楚囊之請雖幾而彌固衛

魚之心身二，而意結一宮軫。慟遐邇同哀，追贈侍中領衛將軍。給鼓吹一部，謚曰昭侯。時皇上納麓在辰，登庸伊始，允副朝端。兼掌屯衛，聞凶哀震，感絕移時。因遘沈疴，緜留氣序。世祖日夜憂懷，備盡寬譬，勉膳禁哭，中使相望。上雖外順皇旨，內殷私痛，獨居不御酒肉，坐臥泣涕，霑衣若此。移年癯瘠，改貌天倫之愛，振古莫儔。及俯膺天眷，入纂絕業，分命懿親，台牧並建，對繁弱以流涕，望曲阜而含悲。改贈司徒，因謚爲郡王。禮也。惟公少而英明，長而弘潤，風標秀舉，清暉映世。學編書部，特善玄言。輦悅之麗，篆籀之則，窮六義於懷抱，究八體於毫端。亦思之微，秋儲無以競巧，取睽之妙，流睇未足稱奇。至公以奉上，鳴謙以接下，撫僚庶盡盛德之容，交士林忘公

侯之貴，虛懷博納，幽關洞開，宴語談笑，情瀾不竭，譽滿天下。德冠生民，蓋百代之儀表。千年之領袖，曾不慙。留梁摧奄及，豈唯僑終蹇謝，典謚輟相而已哉。凡我僚舊，均哀共戚，怨天德之無厚，痛棠陰之不留。思所以克播遺塵，敝之穹壤，乃刊石圖徽，寄情銘頌。其辭曰：

天命玄鳥，降而生商。是開金運，祚始玉筐。三仁去國，五曜入房。亦白其馬，侯服周王。本枝派別，因菜命氏。涉徐而東，義均梁徙。自茲以降，懷青拖紫，崇基巖巖，長瀾瀾瀾。惟聖造物，龍飛天步，載鼎載革，有除有布。高皇赫矣，仰膺乾顧。景皇蒸哉，實啓洪祚。喬嶽峻峙，命世興賢。應期誕德，絕後光前。幾以成務，覺在民先。位非大寶，爵乃上天。爰始濯纓，清猷濬發。升降

文陸透迤魏闕惠露霑吳仁風扇越涉夏踰漢政成期月用
簡必從日新爲盛在上哀矜臨下莊敬草木不夭昆蟲得性
我有芳蘭民胥攸詠羣夷蠢蠢巖別嶂分傾山盡落其從如
雲挈妻荷子負戴成羣廻首請吏曾何足云音聞天道仁罔
不遂彼蒼如何興山止簣四牡方馳六龍頓轡斯民曷仰邦
國殄瘁齊隕晏平行哭致禮趙祖昌國列邦揮滄況我君斯
皇之介第哀感徒庶勸興雲陛階毀留攢川汎歸軸競羞野
奠爭攀去轂遵渚號追臨渡望哭無絕終古惟蘭與菊塗由
帝渚朱軒靡駕東首坐園卽宮長夜逝川無待黃金難化鐘
石徒刊芳猷永謝

墓誌類

劉先生夫人墓誌

任昉

既稱萊婦亦曰鴻妻復有令德一與之齊實佐君子簪蒿杖
藜欣欣負載在冀之畦居室有行亟聞義讓稟訓丹陽弘風
丞相籍甚一門風流遠尚肇允才淑闡德斯諒蕪沒鄭鄉寂
寥楊冢參差孔樹毫末成拱暫啓荒塋長局幽隴夫貴妻尊
匪爵而重

行狀類

齊竟陵文宣王行狀

任昉

祖太祖高皇帝

父世祖武皇帝

南徐州南蘭陵郡縣都鄉中都里蕭公年三十五行狀

公道亞生知照隣幾庶孝始人倫忠爲令德公實體之非毀
譽所至天才博瞻學綜該明至若曲臺之禮九師之易樂分
龍趙詩析齊韓陳農所未究河間所未輯有一於此罔不兼
綜者歟昔沛獻訪對於雲臺東平齊聲於楊史淮南取貴於
食時陳思見稱於七步方斯蔑如也初沈攸之跋扈上流稱
亂陝服宋鎮西晉熙王南中郎邵陵王並鎮益口世祖毗贊
兩藩而任總西伐公時從在軍鎮西府版寧朔將軍軍王南
中郎版補行參軍署法曹于時景燭雲火風馳羽檄謀出股
肱任切書記遷左軍邵陵王王簿記室參軍既允焚林之求
實兼儀形之寄刀筆不足宣功風體所以弘益除邵陵王友
又爲安南邵陵王長史東夏形勝關河重複選衆而舉敦悅

斯在除使持節都督會稽東陽臨海永嘉新安五郡諸軍事
輔國將軍會稽太守太祖受命廣樹藩屏公以高昭武穆惟
威惟賢封聞喜縣開國公食邑千戶又以奏課連最進號冠
軍將軍越人之巫覩正風而化俗篁竹之首感義讓而失險
邪叟忘其西曷龍丘挾其東皇會武穆皇后崩公星言奔波
泣血千里水漿不入於口者至自禹穴逮衣裳外除心哀內
疚禮屈於厭降事迫於權奪而茹感肌膚沉痛創距故知鐘
鼓非樂云之本緣釐非隆殺之要改授征虜將軍丹陽尹良
家入徙戚里內屬政非一軌俗備五方公內樹寬明外施簡
惠神臯載穆轂下以清武帝嗣位進封竟陵郡王食邑如千
戶復授使持節都督南徐兗二州諸軍事鎮北將軍南徐州

刺史遷使持節侍中都督南兗徐北兗青冀五州諸軍事征北將軍南兗州刺史充徐接壤素漸河潤未及下車仁聲先洽玉關靖柝北門寢扃朝旨以董司岳牧敷興邦教方任雖重比此爲輕徵護軍將軍兼司徒侍中如故又授車騎將軍兼司徒侍中如故卽授司徒侍中又如故上穆三能下敷五典關玄闡以闡化寢鳴鐘以體國翼亮孝治緝熙中教奪金恥訟溪田自嘿不彫其朴用晦其明聲化之有倫繫公是賴庠序肇興儀形國胄師氏之選允歸人範以本官領國子祭酒固辭不拜入座初啓以公補尚書令式是敷奏百揆時序夫國家之道互爲公私君親之義遞爲隱犯公二極一致愛敬同歸亮誠盡規謀猷弘遠矣又授使持節都督揚州諸軍

事揚州刺史本官悉如故舊惟淮海今則神牧編戶殷阜萌俗滋繁不言之化若門到戶說矣頃之解尚書令改授中書監餘悉如故獻納樞機絲綸允緝武皇晏駕寄深負圖公仰惟國典俛遵遺託俯擬天倫踊絕于地居處之節復如居武穆之憂聖主嗣興地居旦奭有詔策授太傅領司徒餘悉如故坐而論道動以觀德地尊禮絕親賢莫貳又詔加公入朝不趨讚拜不名劔履上殿蕭傅之賢曹馬之親兼之者公也復以申威重道增崇德統進督南徐州諸軍事餘悉如故並表疏累上身沒讓存天不憖遺梁岳頽峻某年某月日薨春秋三十有五詔給溫明秘器歛以袞章備九命之禮遣大鴻臚監護喪事朝夕奠祭太官供給禮也故以勵極津門感充

長樂。豈徒春人。不相傾壘。罷肆而已哉。乃下詔曰。褒崇庸德。前王之令典。追遠尊戚。公情之所隆。故使持節都督揚州諸軍事中書監太傅領司徒揚州刺史竟陵王。新除進督南徐州體履正神鑒淵邈道冠民宗具瞻惟允肇自弱齡孝友光備爰及贊契協升景業燮和台曜五教克宣敷奏朝端百揆惟穆寄重先顧任均負圖諒以齊徽二南同規往哲方憑保祐永翼雍熙天不憖遺奄見薨落哀慕抽割震動于厥心。今先遠戒期龜謀襲吉茂崇嘉制式弘風猷可追崇假黃鉞侍中都督中外諸軍事太宰領大將軍揚州牧綠綬綬具九錫服命之禮使持節中書監王如故給九旒鑿輅黃屋左纛輜輳車前後部羽葆鼓吹挽歌二部虎賁班劍百人葬禮一

依晉安平獻王孚故事。公道識虛遠表裏融通淵然萬頃直上干仞僕妾不覩其喜愠近侍莫見其傾弛他人之善若已。有之民之不減公實貽恥誘接恂恂降以顏色方於事上好下規已而廉於殖財施人不倦帝子儲季令行禁止國綱天憲實諸掌握未嘗鞠人於輕刑銅人於重議人有不及內恕諸已非意相干每為理屈任天下之重體生民之俊華袞與縕緒同歸山藻與蓬茨俱逸良田廣宅符仲長之言邛山洛水協應叟之志丘園東國錙銖軒冕乃依林構宇傍巖拓架清爰與壺人爭旦緹幙與素瀨交輝置之虛室人野何辨高人何點躡屩於鐘阿徵士劉虬獻書於衡岳贈以古人之服弘以度外之禮屈以好士之風申其趨王之意乃知大春屈

已五王君大降節憲后致之有由也其卉木之奇泉石之美
公所製山居四時序言之已詳又皇帝養德東朝同符作者
爰造九言實該自行遵衿禱於未萌申炯戒於茲日非直且
暮千載故乃萬世一時也命公註解衛將軍王儉綴而序之
山宇初構超然獨往顧而言曰死者可歸誰與入室尚想前
良俾若神對乃命書工圖之軒牖旣而緬屬賢英傍思才淑
匹婦之操亦有取焉有客游梁朝者從容而進曰未見好德
愚竊惑焉卽命刊削投杖不暇公以爲出言自口驥驟不迫
聽受一謬差以千里所造箴銘積成卷軸門階戶席寓物垂
訓先是震于外寢匠者以爲不祥將加治葺公曰此天譴也
無所改脩以記吾過且令戒懼不怠從諫如順流虛已若不

足至於言窮藥石若味滋音信必由中貌無外悅貴而好禮
怡寄典墳雖率以物役孜孜無怠乃撰四部要略淨任子並
勸成一家懸諸日月弘洙泗之風闡迦維之化大漸彌留話
言盈耳黜殞之請至誠懇惻豈古人所謂立言於世沒而不
朽者歟易名之典請遵前列謹狀

弔文類

弔屈原文 并序

賈誼

誼爲長沙王太傅旣以謫去意不自得及渡湘水爲賦以弔
屈原屈原楚賢臣也被讒放逐作離騷賦其終篇曰已矣哉
國無人兮莫我知也遂自投汨羅而死誼追傷之因以自喻
其辭曰恭承嘉惠兮俟罪長沙側聞屈原兮自沉汨羅遺託

湘流兮敬弔先生遭世罔極兮乃隕厥身嗚呼哀哉逢時不
祥鸞鳳伏竄兮鴟梟翱翔闖茸尊顯兮讒諛得志賢聖逆曳
兮方正倒植世謂隨夷為溷兮謂跖蹻為廉莫邪為鈍兮鉞
刀為銛吁嗟默默生之無故兮幹棄周鼎寶康瓠兮騰駕罷
牛驂蹇驢兮驥垂兩耳服鹽車兮章甫薦履漸不可久兮嗟
苦先生獨離此咎兮訊曰已矣國其莫我知兮獨壹鬱其誰
語鳳漂漂其高逝兮固自引而遠去襲九淵之神龍兮沕深
潛以自珍倘螻蟻以隱處兮夫豈從蝦與蛭蟻所貴聖人之
神德兮遠濁世而自藏使騏驥可得係而羈兮豈云異夫犬
羊般紛紛其離此尤兮亦夫子之故也歷九州而相其君兮
何必懷此都也鳳凰翔于千仞兮覽德輝而下之見細德之

險微兮遙增擊而去之彼尋常之汙瀆兮豈能容夫吞舟之
巨魚橫江湖之鱣鯨兮固將制於螻蟻

弔魏武帝文 并序

陸機

元康八年機始以臺郎出補著作游乎秘閣而見魏武帝遺
令愴然歎息傷懷者久之客曰夫始終者萬物之大歸死生
者性命之區域是以臨喪殯而後悲觀陳根而絕哭今乃傷
心百年之際興哀無情之地意者無乃知哀之可有而未識
情之可無乎機答之曰夫日蝕由乎交分山崩起於朽壤亦
云數而已矣然百姓怪焉者豈不以資高明之質而不免卑
濁之累居常安之勢而終嬰傾離之患故乎夫以迴天倒日
之力而不能振形骸之內濟世夷難之智而受困魏闕之下

已而格乎上下者。藏於區區之木。光于四表者。翳乎葭爾之
土。雄心摧於弱情。壯圖終於哀志。長算屈於短日。遠跡頓於
促路。嗚呼。豈特瞽史之異。闕景黔黎之怪。頽岸乎。觀其所以
顧命冢嗣。貽謀四子。經國之略。既遠。隆家之訓。亦弘。又云。吾
在軍中。持法是也。至於小忿。怒大過失。不當效也。善乎。達人
之讜言矣。持姬女。而指季豹。以示四子。曰。以累汝。因泣下。傷
哉。曩以天下自任。今以愛子託人。同乎盡者。無餘而得乎。亡
者。無存。然而姦變。房闈之內。綢繆。家人之務。則幾乎密。與又
曰。吾媿好妓人。皆著銅雀臺於臺堂上。施八尺牀。張總帳。朝
脯土。脯糲之屬。月朝十五日。輒向帳作妓。汝等時時登銅雀
臺。望吾西陵墓田。又云。餘香可分與諸夫人。諸舍中無所爲。

學作履組賣也。吾歷官所得綬。皆著藏中。吾餘衣裘。可別爲
一藏。不能者。兄弟可共分之。既而竟分焉。亡者可以勿求。存
者可以勿違。求與違。不其兩傷乎。悲夫。愛有大而必失。惡有
甚而必得。智惠不能去其惡。威力不能全其愛。故前識所不
用心。而聖人罕言焉。若乃繫情累於外物。畱曲念於閨房。亦
賢俊之所宜廢乎。於是遂憤懣而獻弔云爾。

接皇漢之末緒。值王塗之多違。佇重淵以育麟。撫慶雲而遐
飛。運神道以載德。乘靈風而扇威。摧羣雄而電擊。舉勅敵其
如遺。指八極以遠略。必翦焉而後綴。釐三才之闕典。啓天地
之禁闈。舉脩綱之絕紀。紐大音之解徽。掃雲物以貞觀。要萬
塗而來歸。不大德以宏覆。援日月而齊暉。濟元功於九有。固

舉世之所推。彼人事之大造。夫何往而不臻。將覆篲於浚谷。擠爲山乎九天。苟理窮而性盡。豈長算之所研。悟臨川之有悲。固梁木其必顛。當建安之三八。實大命之所艱。雖光昭於曩載。將稅駕於此年。惟降神之縣邈。眇千載而遠期。信斯武之未喪。膺靈符而在茲。雖龍飛於文昌。非王心之所怡。憤西夏以鞠旅。沂秦川而舉旗。踰鎬京而不豫。臨渭濱而有疑。冀翼日之云瘳。彌四旬而成災。詠歸塗以反旆。登嶠澠而竭來次。洛汭而大漸。指六軍曰念哉。伊君王之赫奕。寔終古之所難。威先天而蓋世。力盪海而拔山。厄奚險而弗濟。敵何彊而不殘。每因禍以禔福。亦踐危而必安。迄在茲而蒙昧。慮禁閉而無端。委軀命以待難。痛沒世而永言。撫四子以深念。循膚體而積歎。迨營鬼之未離。假餘息乎音翰。執姬女以嘔瘁。指季豹而漼焉。氣衝襟以嗚咽。涕垂睫而沈瀾。違率土以靜寐。戢彌天乎一棺。咨宏度之峻邈。壯大業之允昌。思居終而恤始。命臨沒而肇揚。援貞吝以基悔。雖在我而不臧。惜內顧之纏綿。恨末命之微詳。紆廣念於履組。塵清慮於餘香。結遺情之婉變。何命促而意長。陳法服於帷座。陪窈窕於玉房。宣備物於虛器。發哀音於舊倡。矯感容以赴節。掩零淚而薦觴。物無微而不存。體無惠而不亡。庶聖靈之響像。想幽神之復光。苟形聲之翳沒。雖音景其必藏。徽清絃而獨奏。進脯糲而誰嘗。悼總帳之冥漠。怨西陵之茫茫。登雀臺而羣悲。貯美目其何望。既晞古以遺累。信簡禮而薄葬。彼裘紱於何有。貽塵謗

體而積歎。迨營鬼之未離。假餘息乎音翰。執姬女以嘔瘁。指季豹而漼焉。氣衝襟以嗚咽。涕垂睫而沈瀾。違率土以靜寐。戢彌天乎一棺。咨宏度之峻邈。壯大業之允昌。思居終而恤始。命臨沒而肇揚。援貞吝以基悔。雖在我而不臧。惜內顧之纏綿。恨末命之微詳。紆廣念於履組。塵清慮於餘香。結遺情之婉變。何命促而意長。陳法服於帷座。陪窈窕於玉房。宣備物於虛器。發哀音於舊倡。矯感容以赴節。掩零淚而薦觴。物無微而不存。體無惠而不亡。庶聖靈之響像。想幽神之復光。苟形聲之翳沒。雖音景其必藏。徽清絃而獨奏。進脯糲而誰嘗。悼總帳之冥漠。怨西陵之茫茫。登雀臺而羣悲。貯美目其何望。既晞古以遺累。信簡禮而薄葬。彼裘紱於何有。貽塵謗

於後王嗟大戀之所存故雖哲而不忘覽遺籍以慷慨獻茲
文而悽傷

祭文類

祭古冢文 并序

謝惠連

東府掘城北漸入丈餘得古冢上無封域不用磚甃以木爲
槨中有二棺正方兩頭無和明器之屬材瓦銅漆有數十種
多異形不可盡識刻木爲人長三尺可有二十餘頭初開見
悉是人形以物振撥之應手灰滅棺上有五銖錢百餘枚木
中有甘蔗節及梅李核瓜瓣皆浮出不甚爛壞銘誌不存世
代不可得而知也公命城者改埋於東岡祭之以豚酒旣不
知其名字遠近故假爲之號曰冥漠君云爾

元嘉七年九月十四日司徒御屬領直兵令史統作城錄事
臨漳令亭侯朱林具豚醪之祭敬薦冥漠君之靈忝總徒旅
版築是司窮泉爲壑聚壤成基一擲旣啓雙棺在茲拾畚悽
愴縱鍾漣瀉芻靈已毀塗車旣摧几筵糜腐俎豆傾低盤或
梅李盎或醢醢蔗傳餘節瓜表遺犀追惟夫子生自何代曜
質幾年潛靈幾載爲壽爲夭寧顯寧晦銘誌堙滅姓字不傳
今誰子後曩誰子先功名美惡如何蔑然百堵皆作十仞斯
齊墉不可轉壑不可迴黃腸旣毀便房已頽循題興念撫備
增哀射聲垂仁廣漢流渥祠骸府阿掩骼城曲仰羨古風爲
君改卜輪移北隍窀穸東麓壙卽新營棺仍舊木合葬非古
周公所存敬遵昔義還祔雙魂酒以兩壺牲以特豚幽靈髣

髯歎我犧樽嗚呼哀哉

祭屈原文

顏延之

維有宋五年月日。湘州刺史吳郡張邵。恭承帝命。建旗舊楚。訪懷沙之淵。得捐珮之浦。弭節羅潭。艤舟汨渚。乃遣戶曹掾某。敬祭故楚三閭大夫屈君之靈。蘭薰而摧。王綰則折物忌。堅芳人諱。明潔曰若。先生逢辰之缺。溫風怠時。飛霜急節。羸芋蓬紛。昭懷不端。謀折儀尚。貞茂椒蘭。身絕郢闕。跡徧湘干。比物荃蓀。連類龍鸞。聲溢金石。志華日月。如彼樹芬。實穎實發。望泪心歘。瞻羅思越。藉用可塵。昭忠難闕。

祭顏光祿文

王僧達

維宋孝建二年。九月癸丑朔十九日辛未。王君以山羞野酌。敬祭顏君之靈。嗚呼哀哉。夫德以道樹。禮以仁清。惟君之懿。早歲飛聲。義窮幾象。文蔽班揚。性粹剛絜。志度淵英。登朝光國。實宋之華。才通漢魏。譽浹龜沙。服爵帝典。棲志雲阿。清交素友。比景共波。氣高叔夜。嚴方仲舉。逸翮獨翔。孤風絕侶。流連酒德。嘯歌琴緒。游顧移年。契濶宴處。春風首時。爰談爰賦。秋露未凝。歸神太素。明發晨駕。瞻廬望路。心悽目泣。情條雲互。涼陰掩軒。娥月寢耀。微燈動光。几牘誰炤。衽袵長塵。絲竹罷調。孽悲蘭宇。屑涕松嶠。古來共盡。牛山有淚。非獨昊天。殲我明懿。以此忍哀。敬陳奠饋。申酌長懷。顧望歔歔。嗚呼哀哉。

文選正文卷之十二

古來所傳國刻文選正文若干悉皆以國字左右附注如馬駘
之足塾師授之弟子受之讀畢而不知歷代諸家之作譬諸嫁
媵買櫝亦唯有勞無功而已南郭服老閔之刻白文以授之善
則善矣未讀而韞匱之世遂無知之者唯吾山子執中譯之有
益學者是以東西南北一皆從之每歲而前版磨滅風月堂氏
欲翻刻之抑此書前版雕刻既成而後使吾友葛子福校之雅
有謬誤難改正者有之曲從以至今日則請余校閱之而余衰
老多事則一二閱之而使見謙重訂之於是文字誤者圈點失
者其譁紕繆者數千盡改之以授剞劂氏雖然蕭氏所選數十
萬言焉期不有少遺漏哉乃其補闕拾遺當俟後之學者矣

文政癸未冬十一月

信州久保愛識



天明四年甲辰

元刻

文政十一年戊子

再刻

京師書肆

風月庄左衛門

